

2021
AÑA DI RECUPERACION

2021

ISLA(•)NLINE

Diaranson 7 April 2021

Email: IslaOnline@gobierno.aw Tel: 528-4900

2021

AÑA DI RECUPERACION

ISLA ONLINE
NOTICIA DI GOBIERNO



GOBIERNO DI ARUBA



Prome Minister Evelyn Wever-Croes: Acuerdo Aruba y Hulanda pa di dos kwartal ARUBA TA DEN CUMPLIMENTO

E di dos Agenda di Ehecucion a keda aproba entre Hulanda y Aruba

Dialuna dia 29 di maart 2021, Aruba y Hulanda a acorda e contenido di e di dos Agenda di Ehecucion relaciona cu e trayecto di Landspakket di Aruba. Esaki a tuma luga durante un reunion cu Secterario di Estado Raymond Knops y Minister-President di Aruba Sra. Evelyn Wever-Croes como tambe profesionalnan di ambos pais.

No obstante e intensidad di e trabounan, pais Aruba ta cumpliendo den gran forma cu e condicionnan stipula pa asina por ricibi sosten di likides. Un aspecto cu a keda confirma den carta di Secretario di Estado Raymond Knops, dirigi na Presidente di Parlamento Hulandes (Tweede Kamer der Staten-Generaal), riba 26 di maart 2021.

Manera a keda acorda na november 2020, cada kwartaal crea un Agenda di Ehecucion cu ta sigui e agenda di ehecucion anterior den forma coherente y cronologico.


Despues di un periodo di introduccion, e di dos Agenda di Ehecucion ta consisti di trabounan mas intenso y concreto.

E di dos Agenda di Ehecucion tambe ta simbolisa inicio di proceso di consulta cu diferente partner clave, diferente gremio den nos comunidad.

Durante un reunion publico den Parlamento di Aruba Gobierno lo duna mas splicacion tocante e di dos Agenda di Ehecucion. Y pronto lo tin e prome consulta cu gremionan, cual lo tuma luga di forma virtual.

E Agenda di Ehecucion ta un documento cu lo wordo adapta continuamente. Esaki lo tuma luga den colaboracion estrecho entre paisnan.

Pais Aruba ta riba bon caminda y cu respet, madures y dedicacion, hunto nos lo recupera nos pais.



≡ FitchRatings

FITCH TA DEMOSTRA
CONFIANSA DEN **ARUBA**
Y TA CAMBIA E OUTLOOK
DI NEGATIVO PA **STABIEL**

7 APRIL, 2021

Aruba



GOBIERNO DI ARUBA



Minister Xiomara Maduro ta informa: **FITCH TA CAMBIA RATING DI ARUBA FOR DI NEGATIVO PA STABIL**

Aruba su economia ta demostrando su resiliencia



Awe Gobierno a ricibi e grato noticia for di New York cu e compania di rating FITCH a cambia e perspectiva di Aruba di BB-negativo pa BB-stabil. Algun siman atras Standard & Poor's tambe a adapta e rating di BBB-negativo pa BBB-stabil. Gobierno di Aruba ta sumamente satisfecho cu e resultadonan aki, pasobra ambos compania di rating ta confirma cu apesar di e golpinan severo riba economia mundial den e prome aña di COVID, e economia di Aruba a sa di wanta e impacto enorme di COVID. Aruba su economia a demostra su resiliencia y nos tin un fundeshi fuerte riba cual por sigui traha pa recupera di e sla economico cu COVID ta trece cune.

REACION RAPIDO Y ACUERDO CU HULANDA A YUDA ARUBA

Un aña pasa Fitch a downgrade Aruba su rating cu dos notch (BBB- a bira BB) y a pone un expectativa negativo pa nos Pais, debi na e hecho cu Aruba ta depende grandemente di turismo y cu ta hustamente turismo ta locual mudialmente lo sinti e efecto negativo di e medidanan pa frena e pandemia. Den su rapport FITCH ta mustra cu den e prome aña di COVID

e Gobierno di Aruba a reaciona rapido, eficiente y a traha den forma pragmatico hunto cu Reino Hulandes pa yega na areglonan di cooperacion cu a sostene Aruba su economia. Esakinan a duna resultado cu FITCH ta reconoce y e hecho cu Aruba ta bay sigui ricibi e sosten di Hulanda, ta duna FITCH e confiansa pa haci cambio na Aruba su rating di negativo pa stabil.

UN NOTICIA POSITIVO PA ARUBA

E cambio di rating aki di FITCH ta un noticia importante pa Aruba. E ta significa cu inversionistanan internacional y local por ta trankilo cu Aruba apesar di e sla di COVID na nos economia ta keda un Pais sigur y factibel pa inversion. Gobierno tambe ta beneficia di un bon rating, ya cu un bon rating ta yuda controla e tasa di interes riba e debe nacional. Si e tasa bay for di man e gastonan di Gobierno ta subi automaticamente. Pa e motibo aki durante e aña cu a pasa Gobierno a atende cu tur inversionista y tur rating agencies na un forma pro-activo y transparente brindando na tur momento informacion pa nan ta na altura di locual ta pasando y e plannan cu Aruba a bin ta desaroya. Minister Xiomara Maduro ta gradici FITCH ratings, Departamento di Finansa y tur persona y instancia cu a colabora pa haci e evaluacion uno positivo pa Aruba.

FitchRatings

Minister di Cultura Xiomara Maduro riba Arubadag 2021: **“E ARUBIANO CU TA LEU DI CAS CORDA SEMPER ARUBA DEN MENTE Y CURAZON ESEY TA NOS FORSA PA NOS POR KEDA TRAHA NA SU BIENESTAR”**



Siman pasa a tuma luga evento Arubadag 2021, cual ta un evento importante pa nos aki na Aruba keda den contacto cu Arubianonan biba na Hulanda. Pa Minister Xiomara Maduro tabata un placer pa trece su mensahe durante e evento aki, e dia cu nos Arubianonan na Hulanda ta celebra nos Dia Nacional, Dia di Himno y Bandera. E biaha aki na un manera diferente, den forma virtual nos por ta mas cerca di otro tanto na Aruba, Hulanda y mundo henter. Ta un dia importante pasobra ta 45 aña cu nos ta celebra cu nos tin nos simbolonan nacional, locual ta trece nos hunto cu otro y pone nos sinti nos mes Arubiano den mente y curazon.

Arubadag 2021 ta un momento pa para keto, pasobra 45 aña pasa na momento cu nos Himno a wordo toca pa prome biaha y nos Bandera a bay laira pa prome biaha den Wilhelmina Stadion, nos por a mira cu na Hulanda tambe tabata tin movecion bao di liderazgo di Sra. Rosina “Dechi” Langedijk Thijssen cu a organisa pa Arubianonan bini hunto pa papia

di e lucha pa Aruba su Status Aparte. E tempo ey tambe a reuni un multitud di Arubianonan na Schiphol pa ricibi nos Libertador G.F. Betico Croes na su yegada na Hulanda. Aki ta unda pa prome biaha e palabra Arubadag a resona. Cu tempo Arubadag a bira un plataforma importante pa Arubianonan y tur cu tin Aruba den mente y curason, pa topa otro pa comparti den e esfera di cordialidad cu ta nos grandesa cu semper nos Himno ta corda nos di dj’e.

Minister di Cultura Xiomara Maduro ta gradici Minister Plenipotenciario Guilfred Besaril y e comision organisador di Arubadag 2021 cu a haci posibel cu mey mey di un pandemia tog nos por a celebra, comparti y sinti e calor di Aruba te na Hulanda. E mandatario ta aplaudi tambe e actividad di Happy 2 Give Back durante di Arubadag 2021 y ta gradici tur cu ta corda riba esnan cu mester di un yudansa na e momentonan aki. Masha pabien cu un bunita celebracion di Arubadag 2021.

RITA WERLEMAN A CONMEMORA 25 ANIVERSARIO DI SERVICIO PA PAIS ARUBA

Dia 11 di maart ultimo a conmemora 25 aniversario di servicio pa Pais Aruba di sra Rita Werleman. Minister Xiomara Maduro a gradici sra. Rita Werleman pa su dedicacion y servicio na Pais Aruba y a entrega na su persona un aprecio. Tabata un rato ameno den compania di Rita su ruman y Director di Departamento di Finansa cu tambe a hiba palabra pa gradici Rita pa su trabou na beneficio di comunidad. Sra. Rita Werleman a splica riba su experiencia y trayectoria como funcionario publico. Masha pabien!



Continuacion RITA WERLEMAN A CONMEMORA 25 ANIVERSARIO....





ARUBA A SURPASA 40.500 PERSONA REGISTRA PA VACUNA Y MAS DI 22.500 PERSONA YA VACUNA

Crisis Team ta informa cu e campaña di vacunacion ta bayendo hopi bon y e cantidad di persona cu a registra pa vacuna y di esnan ya vacuna ta subiendo. Durante di e dia di ayera a surpasa e cantidad di 40 mil persona registra pa vacuna cual ta representa alrededor di un tercera parti di nos poblacion. No ta falta hopi cu nos lo por ta yegando e mita di e poblacion cu lo ta registra pa haya vacuna. E cantidad di personanan vacuna tambe ta subiendo cada dia na Aruba. Ayera a surpasa e cantidad di 22.500 persona vacuna y mas di 10.946 cu ya a ricibi e di dos vacuna.

Na Aruba te cu awe pues tin mas di 33.493 dosis di vacuna cu a keda aplica entre tur esnan cu a ricibi e vacuna. Cada dia ta vacunando alrededor di 1000 persona pa dia y actualmente tin un team special di diferente departamento di Gobierno ta trahando riba e logistica pa aumenta e cantidad di vacunacion pa dia aun mas y ta spera cu por aumenta e capacidad di vacunacion pa otro siman entre 2000 pa 3000 pa dia. Di e forma aki Aruba ta riba caminda di su recuperacion.



Na esnan cu ainda no a registra, no warda mas. Registra via www.dvg.aw of www.arubacovid19.org of via Aruba Health App y e siman aki ainda por registra na MFA.


VACUNA
progresando

PERSONA VACUNA

22,547

Te cu 6 di April pa 7:30pm:

PERSONA REGISTRA	CU E PROME DOSIS	CU TUR DOS DOSIS	TOTAL VACUNA APLICA
40,194	11,601	10,946	33,493





Ami TAMBE ta vacuna!


Departamento di Salud Publico:

UPDATE 7 DI APRIL 2021

Segun resumen di awe 45 persona a recupera, a registra un total di 73 caso nobo di Covid-19, di cual 6 ta no-residente. E cantidad total di testnan ehecuta ayera na e diferente localidadnan na Aruba, entre otro laboratorio di hospital, laboratorionan priva y aeropuerto ta 803 test. 'Positivity rate' entre nos residentenan ta 32%.

Casonan activo pa awe ta 572, cantidad di fayecido relaciona cu Covid-19 a aumenta na 92. Condolencia y forsa na famianan di e fayecido.

Hospital ta informa cu tin un total di 32 persona interna di cual 14 ta den Cuido Intensivo y 18 riba unidad general di covid.

  ARUBA COVID-19			
7/4/2021	TOTAL	RESIDENTE	NO-RESIDENTE
Casonan Nobo	73	67	6
Activo	572	509	63
Recupera	9170	8547	623
Positivo	9834	9144	685
Negativo	121858	-	-
Getest	132152	-	-
Getest na Airport	86657	-	-
Morto	92	91	1





Un Feliz Dia

GABINETE WEVER-CROES

ISLA ONLINE

NOTICIA DI GOBIERNO